

vers. 15. confer. vers. 18. & sic novum tanquam Via-
tores *itinerarium fidei* per hanc *Christologiam* accepe-
runt. *Itinerarium fidei* sequitur *itinerarium vite*, quod
est *itinerarium crucis*, quia *fidelium vita perpetua crucis*
militia, Job. VII. v. 1. *Itinerarium laboris*, cum *otia*
dent vitia, ipsumque pariter *otium pulvinar Satane* di-
catur, *Itinerarium*, dum in laboriosa vita periculo-
sam mortis viam deprehendimus, & in nullo gradu
laborum a periculosis mortis insidiis tuti sumus, aut
esse possumus, vers. 19. *Itinerarium denique felicitatis*
& gaudii, quando nimirum in *Semine Mulieris* cum
Eva vivimus, vestes *Mysticas* vere *sacrificiales* & *sacer-*
dotales induimus, *omne nostrum opus juxta vocationem*
sanctam in Domino facimus, Coloss. III. vers. 17. & in
societate, conversatione, cooperatione Cherubim
cum Protoplastis vivimus, donec ex hoc *militante*
itinerario ad metam gloriae transire possimus, quod
est *itinerarium felicitatis & gaudii*. Sic *Itinerarium terge-*
minum Protoplastorum est benedictum *Itinerarium*
omnium fidelium posterorum. Sicut Exemplo nobis est
Micheas, Propheta, cum ordine Prophetarum omni-
um, Mich. VI. vers. 8. & David in ordine piorum
omnium, Psal. CXVI. v. 10. Quod in nobis omnibus
per *Christologiam Paradisiacam* pariat, custodiat & per-
ficiat *Semen Mulieris* in sui nominis gloriam,
& nostram salutem! Amen!

